

四庫全書

集部

欽定四庫全書

集部

東里續集卷五十九

詳校官檢討

臣羅國俊

中書

臣

劉源溥覆勘

總校官進士

臣楊懋珩

校對官中書

臣范鰲

謄錄舉人

臣呂日永

欽定四庫全書

東里續集卷五十九

明 楊士奇 撰

詩

七言律

靜安亭詩沙溪劉伯川先生席上作時年十二  
處士年將六十齊作亭偏愛屋之西連床圖史孫勤讀  
四壁碁琴客倦嬉驚鼻峯高松鶴唳雞潭波靜水禽啼  
向來翠竹江村路弄月吟風醉不知

和伯陽池上梅花

揚州宅裏舊看花  
南楚頻年不到家  
歲暮豈愁千里隔  
雪殘還對數枝斜  
閒臨綠沼宜相映  
畧洗幽篁不謾遮  
綵筆清詩自堪賞  
銀餅香酒詎須賒

奉和陸伴讀元日雪中早朝韻

高閣餘鍾已罷喧  
繞廊明燭洞無昏  
墀中戒曉初排仗  
殿上迎春正啟門  
雲氣密含香縹緲  
天花低舞雪翩翻  
當時授簡推能賦  
未數相如在兔園

和蕭伴讀秋夜有懷雷道夫時雷從朝京

北極迢遙直帝京故人離闊渺脩程  
望隨流月秋俱滿  
思觸涼颼夜轉生一派笳簫川上合  
九重宮殿日邊明  
從知謝眺懷西府對景題詩並有情

次韻吳孟勤先生中秋有懷府中諸公并自和之作

桂花香滿鵲山頭山下開軒稱及秋  
月色紛當清管落  
涼風輕拂畫簷流  
微微玉漏明河上  
隱隱金門湛露浮  
爲憶鄒枚裁雅曲連篇能倡復能酬

雷道夫隨侍朝京還見示途中諸詩輒用奉柬  
帝子趨朝歸上國儒臣隨侍歷脩程淥波不動聽鼉鼓  
白鴈紛回避羽旌遷迤關河千嶂出參差宮闕五雲明  
非因此去游觀樂誰識當時賦頌聲

舟泊匡廬次韻荅胡生

泊舟遙望匡廬寺惟聽微鐘響曙撞日射紫烟霏灩灩  
風飄高瀑洒淙淙常因來往懷香閣未得登臨躡石矸  
時遇鄉園文翰侶又乘湖艇下雙雙

寄題貽厥堂 二首

南平郭裏東西住，曾見名家六世來。  
前輩風流皆壽俊，後人文采發英才。  
春深欄檻雲生竹，歲晚階除雪映梅。  
貽厥堂中最瀟灑，四時清景隔浮埃。

堂前蘭桂豔春榮，堂上衣冠老更清。  
自倚詩書傳世業，每持義利振鄉評。  
故家宦譜行當續，前代文章疊有聲。  
同學少年俱白首，幾時相聚慰平生。

送鍾啓晦南雄訓導

試藝晨趨祕閣前看君文采冠諸賢  
葩經早得尚書學藻泮重登博士筵  
五月承恩辭北闕一程衝暑向南天  
過家想見寧親處喜說梅關近贛壩

送康孔高

雲南南望不須憂千里零陵赴舊游  
復職親承當宁命過鄉先慰倚門愁  
數家漁舍連江郭盡日山光滿郡樓  
博士到家多雅趣弦歌聲裏度春秋

送李思益沐陽教諭



長樂疎鐘應曉晴  
千門楊柳動春鶯  
重來拜命瞻龍闕  
又促携書出鳳城  
驛路看山經幾處  
縣庠端笏見諸生  
十年一會還分手  
未盡鄉園間濶情

送永嘉秀才赴福寧教諭

博士承恩出九重  
小車晨發鳳臺東  
遙知海道連鄉郡  
喜說山城有學宮  
雨過千家榕葉綠  
秋清滿縣木犀紅  
何幸明經逢聖代  
須看揚鐸振儒風

送王所存會昌訓導

一棹之官路已賒連天新漲更無涯遙看贛嶺知何處  
暫過文江喜是家縣郭晴飛青嶂雨講堂秋對白鷗沙  
到家應際重陽節清洒華筵聚菊花

送董海州

述職三回謁帝京喜緣葭玉見深情退朝屢枉高軒過  
傑直常孤倒屣迎淮浦落潮隨去棹海天涼露拂歸旌  
傷心一掬鵲原汨洒翰煩君寄楚城

挽李處士

不受遺金世共知至今鄉里繫遐思  
賢郎已擢科名貴太史新題孝友碑  
碧水園林違翫賞青松丘壑閔容儀  
朝來晚翠堂前過惟有家人哭素帷

和胡祭酒對雪韻

清旦同雲闕彩霞帝城又見雪飛花  
青林綴玉真看畫銀沼分冰好試茶  
欲放剡舟乘逸興競傳郢曲到西家  
豐年有兆占三白總覺新來喜氣嘉

挽李孔目

詞苑清華近禁闌幕賓如子眼中稀庭無私謁惟看竹  
官有閒時盡掩扉每喜楓宸同曉覲忽驚薤露已朝晞  
淒涼南浦來時路秋雨銘旌逐鴈歸

挽蘇檢討伯厚

輶車晨發大江東歸塋閩山馬鬣封千載交游悲墜露  
百年心跡逐飄風空餘海內詩名在無復朝端禁直同  
藉是詞林知己舊銘文光映九原中

送劉廸哲吉水訓導

鄉郡知名逾十載初承薦剡謁彤闈李邕識面仍難遇  
劉向傳經喜得歸臘雪渾飄征袂濕江鴻遙逐去帆飛  
青春想見沾時雨桃李花開映講帷

送陳公餘赴高安訓導兼柬本之

兩家姻好託斯文楊氏賢甥復有孫經學已能傳世業  
儒官何幸拜君恩從知備養依微祿且喜移家近故園  
還共郡庠梁博士朝朝來往事清論

送許子謨博士歸北京

邂逅京華歲欲闌  
尊前論舊雜悲歡  
十年離別空相憶  
萬里驅馳只獨難  
已喜驂駟歸御廐  
遠隨鴛鴦拜金鑾  
明朝又過長淮去  
玉雪紛紛撲馬鞍

挽括蒼樊處士 二首

早辭薦剡樂山居  
荷芰紉衣草結廬  
歡奉慈顏登壽考  
恩沾同氣到遺孤  
秋雲繞屋常看竹  
夜月臨軒或據梧  
惆悵佳城今鬱鬱  
只應來往奠生芻

黃金散盡爲憐貧  
芳譽流傳滿縉紳  
倒橐屢分行路客

買舟遙送望鄉人  
少微雲際冥冥色  
棠棣原頭寂寂春  
世澤不忘天道直  
銀臺今睹鳳毛新

送周茂才

盛世科名推小宋  
故家孝弟重元方  
一春聽雨同羈館  
千里看雲憶舊鄉  
淮水路邊芳草合  
桑園徑裏落花香  
到門五彩承歡處  
遙想從容話玉堂

送晁司直景範致仕歸濟寧

春坊輔導集羣英  
清德多聞最老成  
天上歸來投散逸

道傍祖送歎光榮聖朝雨露涵濡厚晚節功名去住輕  
共羨行年今伏勝遺經還待教諸生

題菊贈鵷姪

有序

舊得閩人蘇季雅寫菊鵷姪走二千里來京師省  
余病其歸也以此贈之且書述懷一詩于上并示

弼艮云耳

南望家山無盡情衰年一病死兼生春風遠道憐賢姪  
夜雨他鄉夢老兄千載詩書存世業幾家忠信重鄉評



從來明達安時命珍重諸郎在矯輕

送尹自道

新安二守辭朝日積雨初收暑頓輕秋盡平蕪涼露滿  
月明長浦夕潮生片帆浩蕩催行色斗酒殷勤寄別情  
還有梅花可持贈歲寒冰雪照同清

送胡孔時省親豐縣

遙瞻淮岫隔親闈初下鍾陵過帝畿豈憚驅馳前路遠  
不禁消息近時稀渡江飛絮迎行棹到縣鮮桃艷舞衣

慈父喜來慈母望肯緣聞禮久忘歸

表中書陞尚寶少卿其父同日受誥命桂脩撰

索詩

早從潛邸識龍顏白日青雲翥翠鸞久典絲綸唐近職  
又陞符璽漢郎官全家父子光榮重千載君臣際遇難  
帝德如天深化育報恩須倚寸心丹

題梅寄劉仲兼老姪

故家遺澤根株盛素蓋含香吐正齊雪後曾尋珠浦側

春來先映白橋西十年去邑心相念千里披圖手自題  
珍重歲寒貞操在水南清鶴待重携

次韻荅耐軒學士病中見寄

龍河初暖動春波久病文園近若何知有官曹頻問訊  
自慚隣舍少經過茶香永夜分能數詩句新年寫漸多  
雪繭烏絲煩屢寄閒燒紅燭和清哦

得第二子

四月五日得家書報二月十四夜生  
第二子翼日昭告祖考以後仲殷

素蟾未滿一分圓正照垂孤竹下門因報添丁徵近夢  
翻悲生我重慈恩箕裘倘解傳弓冶水木端期繼本源  
百世奉嘗今日始敢伸虔告薦頻繁

二月十四夜余宿  
試院夢侍辰齋府

君既覺已三鼓蓋此兒初生之  
時也遂取夢中語名之曰科云

樊通政守一齋有序

樊通政守一以其字扁齋居屬予賦詩夫一之義  
若老聃莊周管仲韓非之言或虛而無實或雜而  
非正惟出於大舜伊尹孔子之訓者吾輩之所當

務輒賦五十六字於齋扁之下云

衆萬之源純不雜還因表字揭齋名已知要道無歧路  
所貴專心事篤行大學工夫由主敬古人勲業自存誠  
始終表裏恒無失此是齋中座右銘

送熊昱御史

豐城熊昱元天慵先生曾孫太古先生之孫舉進  
士爲監察御史持身守官篤實不銜今滿三年其  
尊府先生春秋九十餘矣即謁告歸省余重名賢

有後賦詩贈之且慶其尊府先生之壽云

故家文獻驅前代金榜科名起聖朝  
憲府飛霜持白簡繡衣炫日近丹霄  
歸程萬里秋隨鴈挂席三山曉帶潮  
春酒還家酌萸菊高堂眉壽等松喬

次韻袁止安太常南歸留別

文雅人推賀監賢承宣數近九重天  
優閒有幸沾榮命寵祿無心及暮年  
自斲紫芝充服食閒騎白鹿傍雲泉  
挂冠神武誰無意遲我洪厓玉笥邊

送兗州郡學教授

兗府諸生久待師廣文新去擁皋比闕宮舊有周公祀  
泮水今傳魯國詩清泗流源千古在尼丘佳氣五雲微  
講餘時出城東郭瞻仰從知重所思

送尹御史

久住南京共接隣北京爲別已經春每懷鄉邑踈歡聚  
又向都門送故人萬里雲霄鵬翮健九苞文采鳳毛新  
一身上有君親望珍重芳名在縉紳

挽彭處士

溪園脩竹映桃花，負郭幽居逸趣賒。  
自惜世家存禮樂，時過隣曲看桑麻。  
堂餘素簡人何在，墓繞青山世共嗟。  
因讀銘文思往事，感懷況是舊通家。

送陳素行

去年相別蕭藤縣，此日重看博士行。  
桂嶺迢遙懷二僑，榕陰瀟灑對諸生。  
雨肥丹荔漿堪挹，霜下黃茆瘴已清。  
知有少游文字在，倘摹遺刻寄都城。



黃友文教授解官歸建寧

京華十載託隣居朝夕相從意不踈  
屢接賓筵同唱咏靜聞師館授詩書  
青雲倦翮能辭寵白首閒情樂逐初  
一片烟霞人境外幅巾蕭散有誰如

追送江仲隆紀善兼寄羅思程博士

二首

來朝京國遂懸車老去王門罷曳裾  
白髮蒼顏歸舊里青山紅樹託幽居  
閒穿竹逕行携鶴更傍荷塘坐看魚  
道在未應全散逸諸生須授伏生書

京華相憶幾經春，頗恨重來不問人。  
行館空尋深巷曲，歸舟先發大河濱。  
到家閭里爭迎勞，避俗林泉近隱淪。  
想共湖西羅博士，小車來往似荀陳。

送陳文璧赴石首知縣

金榜青春有令名，玉堂高步接羣英。  
愛民自倚平生志，作縣新承寵命榮。  
薊北霜清寒木落，岳陽烟淨晚山橫。  
六年相聚還相別，不盡秋風送客情。

送陳彝訓赴湖廣參議

洪武中吳文鄭賜同  
爲參議至今民思之

三十年前過鄂城  
藩垣吳鄭最知名  
人懷遺愛至今日  
子繼賢聲在此行  
夢渚茫茫連漢沔  
岳陽渺渺望荆衡  
九重夙夜思民瘼  
應展忠勤答聖明

會稽章友讓半村居

半山亭子江南畔  
又說幽居擅半村  
十里松陰隔城郭  
幾家茅屋接田園  
朝聞鴻鴈琴中落  
秋對芙蓉鏡裏繁  
投老他年定相覓  
欲尋禹穴訪雲門

送劉公潛鬱林知州

萬里邊南望鬱林故人五馬去駸駸傳家自昔春秋學  
用世平生冰檠心岐路寒風驚歲晏衰年短鬢各霜侵  
朝來相送都門外矯首雲鴻思不禁

挽周孟簡長史

翰苑飛騰二十春同鄉同署更情親燈前對酒觥籌數  
竹裏聯詩興韻新染苑延枚心不展湘江吊屈歎何頻  
俄聞瘞玉桑園上老泪潛潛爲故人

送袁尚寶

把酒臨分慘不驕嗟君此別漸難招  
交游託好踰三紀近侍聯班及四朝  
賜服曉霑天闕露歸帆秋帶浙江潮  
白雲滄海東鄴道矯首冥鴻悵望遙

送劉丕武紀善致事

白首王門懶曳裾青山歸去愛吾廬  
天恩已賜雙龍勅家計猶存萬卷書  
林下棲遲芝可茹泉頭來往鹿隨車  
蹇予苦被浮名繫矯首看君愧未如

寄袁止安

十年不見袁高士，知在雲山若箇邊。  
已識道心塵外淨，少將仙篆世間傳。  
秋清白鶴下珠樹，春暖華芝長玉田。  
早晚歸來訪真館，晴牕共閱紫霞編。

送本之赴魯府紀善

泗水尼山天下名，衣冠何幸此中行。  
雲浮海岱蒼茫合，樹接青徐縹緲清。  
聖主惇親過文帝，賢王爲善繼東平。  
碧堂賜醴多恩遇，全勝長沙著賈生。

寄胡祭酒

二首

豫章先生厭軒冕歸來物外託閒身青山江上迢迢郭  
碧樹泉頭淡淡春歲暮丹砂和玉屑日長羽扇映綸巾  
城中冠蓋多如雨解識堯夫有幾人

渺渺南州屬望勞玉堂金馬舊同袍篇章富擬杜工部  
才思清於何水曹京國幾年嗟間濶江村何日共遊遨  
古來同舍多秦越最憶先生獨處高

存仁堂

肘後名方直百金越人帶下業精深功多爲有江湖跡

世遠皆存天地心  
橘葉香浮蘇氏井  
杏花春藹董家林  
鳳樓東畔新堂構  
大扁光華衆所欽

題竹送顧都御史還太康二首

腰佩犀簪首薦冠  
肅將風采振臺端  
心如明月涵秋水  
操比清冰凜夏寒  
鳳勅五文盤玉璽  
龍光千載出金鑾  
從來嵩洛多耆壽  
坐繞琅玕共歲寒

潞渚初晴漲未消  
衣冠祖餞出河橋  
登名科第踰三紀  
奉職京華已四朝  
肯以暮齡孤寵祿  
永懷幽興在漁樵



豈知衰疾淹留者，悵望冥鴻不可招。

送陳正倫太守考績復任

久別南陽陳太守，十年猶是舊青袍。  
路人共說循良政，荒歲深知撫字勞。  
白髮交游吾最老，青雲勲業子能高。  
明時有志應須奮，九萬扶搖看羽毛。

題熊尚初經歷茂恩堂

五花金誥出金門，白髮庭闈拜帝恩。  
當宁褒詞明日月，全家慶澤戴乾坤。  
椿陰綏彩晴逾好，桂馥蘭馨暖更繁。

烏府幕中何以報只應忠孝道彌敦

寄王格非

玉堂分手七年餘蕭散林泉樂遂初鄉里共高王烈行  
家庭常授伏生書穿雲採藥常携鹿傍水持竿亦釣魚  
南北相望六千里一緘聊用慰離居

送清河尹

家住澄江北渚濱清朝兄弟起彬彬同時作宰輝雙璧  
異縣能官見幾人采采黃花滋夕露蕭蕭白鴈度秋旻

相逢未久還相別珍重聲華在縉紳

送呂大理致仕兼寄王孟堅

得謝青雲向白雲緋袍象簡拜天恩從來榮宦心如水  
況是名家學有源日對沃州兼禹穴時尋蘭渚及雲門  
往還知共王脩謨几杖從容足細論

潘賜主事陞鴻臚少卿赴南京

紫泥詔下九重天曾向樽桑海外宣使者旌旗輕萬里  
郎官詞賦欲千篇歸朝已荷君王寵進職今推近侍賢

應到南京公事簡朝朝清趣在韋編

沈處士夫婦挽詩

臨安處士休文後蕭散春秋七十餘荒歲恤人頻發廩  
平生愛子只收書眼着蘭茁森如玉身着荷衣樂飯蔬  
同德相輝更同穴後來憑軾有高車

題竹酬正安友

正安老友自廬山寄惠仙洞松因便以  
寫竹酬之并題詩其上寓思憶之意云

別去京華今十載仰高堂上趣如何曾孫近有含飴樂

使客頻聞艤棹過坐對匡廬延爽氣門臨彭蠡挹清波  
陶公祠裏春秋社醉看傳芭舞且歌

送袁旭知府復任

三年奏最謁彤闈五馬翩翩又賦歸風撼長河水欲合  
霜凋連樹葉分飛從知辛苦蘇民瘼富有聲名出帝畿  
坐對敬亭公事簡吟詩還似謝玄暉

題周孟德淳齋卷

性情澹澹葛天民齋舍清幽迥絕塵玄酒大羹忘世味

閒雲流水任天真農談暇日同鄰叟經訓當年對古人  
豈有機心到機事青松翠竹四時春

送況伯律太守

還捧天書辭玉陛東風五馬去悠悠十年不愧趙清獻  
七縣重迎張益州楊柳翠迷湖上寺杏花紅映水濱樓  
到官正及勸農日郊郭歌謠擁道周

題竹寄陳有戒都憲

關塞秋風霜葉飛又聞跨馬出邊陲多卿爲國忘勞瘁

老我懷賢惜別離萬里屢勤鴻鴈信一緘遙答鳳凰枝  
保民有志堅如石想見西人載路碑

送廣西僉事黃孟清

有序

皇上嗣大寶之初以興學育才爲第一事茂簡文  
學之賢授之憲職加賜璽書俾分督各道學校之  
教期厥成功於時如江西王孟堅湖廣劉公潛廣  
東彭毓敬四川康仲正及之山東西陝洛諸君子  
皆能祇德意明教條焯有成績孟清雖後至廣西

其所設施設功效一與前之諸君子等由是其學者咸趣於實漸革往昔浮虛之弊此皆聖明之賜也而比來言者猶有乞罷督學校之官雖或其因人失當而發夫因噎止餐豈理也哉亦可謂不明大體而易其言者矣君子敬其職惟知盡吾誠人言無足恤哉孟清考績來北京將歸索詩故并及此以致勉勵之意云

昭代光華起一經手提文印廣西行三年宦績看書最



八桂人才屬有成  
白簡重辭金闕去  
黃花紛映繡衣明  
相逢乍語還相別  
勉盡忠誠答聖情

吳廷用侍郎挽詩

十載南京住接隣  
北京相與更情親  
朝端恩寵陞官數  
江上賢勞奉使頻  
聖主親垂君子譽  
近臣誰復古人真  
分携未久遽聞訃  
感悼題詩淚滿巾

仁廟監國時嘗諭  
廷臣曰吳廷用是

君子蓋知  
之最深云

送呂從周平江教諭

荆岳東西路不賒數程來往洞庭沙承恩典教重辭闕  
得祿娛親喜近家江上夜虹書棹遠津頭春樹酒旗斜  
從知子佩趨迎日玄燕將雛柳正花

送張敏赴四川都司經歷

同是青原郡裏人京華邂逅最情親賢關出拜君前命  
帥閫行充幕下賓萬里橋邊連遠徼九江城外泝通津  
臨期無奈匆匆別矯首飛蓬各愴神

寄金文鼎

錦袍新照鬢毛斑歸住吳淞三泖間天上已頒金誥重  
林中不遣綠尊閒畫圖世儼王摩詰詞賦人高庾子山  
無限離情寫相寄明年春鴈待書還

送千子楫中書謝恩還新淦

萬里趨朝上九關紫宸前殿謁龍顏天章已賜封官勅  
雪鬢榮看衣錦還淮上春波連碧草湖邊晴黛擁青山  
他時歸老須相覓知在金川玉筍間

送進士赴南京刑部主事

一經登第拜金鑾六品升朝授好官自昔有家依帝闕  
即今得祿奉親歡英年郎署丹霄近聖代秋官白晝寒  
立志長同冰雪厲扶搖萬里恣鵬搏

送郭鼎貞致仕還臨江

郎官爲政清如水舊有清名遠近聞天上拜辭丹鳳闕  
江南還覓白鷗羣夫容楊柳零秋露彭蠡匡廬渺暮雲  
無數歸帆背人去不禁鄉思日紛紛

送呂仲賢赴南京戶部主事

柳色含金春正融  
御溝冰泮玉波通  
讀書有志逢千載  
承命之官拜九重  
河上好山連濟北  
淮南佳氣望江東  
朝廷邦賦存恒典  
能秉廉勤亦是忠

題竹贈王澄淵歸

握手臨分思不禁  
都門十日雨涔涔  
荒州遠邑存遺愛  
蜀嶺黔江見越吟  
萬里客途堪白首  
三朝臣節只丹心  
清風瀟洒安成郭  
未許投閒坐竹林

送王邦彥大理歸蜀

春坊二十餘年舊此日同朝見幾人老我論思愧臣職  
多君讞議副皇仁西風岐路明紅樹秋渚離情對白蘋  
萬里天恩榮畫錦到家應及歲華新

題何太守畫

宜陽太守彈琴處瀟洒蒼筠白石妍半夜波濤亂春雨  
一拳苔蘚出晴烟郡中舊有房韓政林下那無白阮賢  
直節看渠清似玉姓名琬琰後宜鐫

送清河知縣

當宁仁民秉至誠  
瀕淮今歲少豐登  
憂勤屢下明廷詔  
撫字深資令尹能  
共愛溫如玄圃玉  
直須清比鑑池冰  
清河未必長淹驥  
雲路他年看爾升

胡祭酒宅秋菊盛開僕携酒就賞胡有詩因次  
其韻 二首

庭菊芬芳五色并  
每因來看得怡情  
共憐羈旅增多病  
太息交游減舊盟  
萬事不如閒處樂  
一樽聊就故人傾  
愛花欲種嗟無地  
憑有清詩爲借賡

秋風客裏百愁并春雨江南萬里情時序未忘黃菊興  
江湖猶夢白鷗盟況於衰病淹留際豈有襟懷浩蕩傾  
何怪相過舊同舍一觴易醉句難賡

壽蹇少卿

二首

先皇親製忠貞號甲第新開寵更深周倚仲山能補袞  
商需傳說解爲霖春筵的皪梅舒玉壽筭芬芳醴泛金  
聖代文臣公第一承恩堂上盍華簪

天上星光照錦袍滿堂春色醉仙桃燮調四序勲庸盛



輔翼三朝德望高，咸使華夷慕丰采。  
屢膺綸綍重華褒，不才謬忝夔龍後。  
惟祝南山酌翠濤。

壽建安少傅二首

兩扶紅日上青天，盛有高名海外傳。  
黼黻鴻猷才勝錦，發揮龍誥筆如椽。  
三朝並倚忠勤德，二氣還需變理賢。  
九曲武夷塵境外，功成歸作地行仙。

每挹天瓢潤九區，蓬山高處領文儒。  
梅花獻壽作香雪，竹葉迎春開翠壺。  
闕下引回鴛鴦侶，堂中看舞鳳凰雛。

同官同姓同清健應數耆英笑老迂

連景賢脩譔南歸書此識別

萬里閩關遶嶺海送歸曉發道傍車暫辭金馬玉堂直  
久憶丹山碧水居鴈影將秋先驛騎桂香含露襲衣裾  
到家想及寒梅節觴酒花前會里閭

從游西苑 三首

宮城西畔接蓬萊金飾飛樓玉飾臺輦路前瞻雙鳳引  
鑾輿中駕六龍來時康道泰韶音奏雪淨天清瑞景開

何幸羣臣皆侍從山呼捧獻萬年杯

太液丹霞漾綠波榮光五采貫銀河  
牙樯錦纜移黃繖鳳羽龍旂拂翠荷  
武士威隨嚴鹵簿儒臣謌頌續卷阿  
天王萬歲天同壽歲歲升平樂事多

壺洲閨苑五雲迷紫殿彤樓衆岫低  
日射飛甍金署榜虹連閣道玉爲梯  
流觴宛轉清波送賜扇輝煌御墨題  
欲報寵恩何以祝皇圖帝壽與天齊

寄宗豫

翰苑同袍三十載憂懼何事不相聯論思無補慚予甚  
經濟多能憶子賢竹簟茅檐宜晚歲白雲滄海別經年  
閒居未用渾忘世尚想題詩到日邊

送羅知州之廣德

金殿傳臚起一經青春爲郡引雙旌晴瞻岱岳連齊甸  
晚帶淮潮過楚城千里桑麻相映綠諸生絃誦有餘清  
州侯舊說孫莘老想見懷賢係遠情

和胡祭酒見寄韻二首

自昔襟懷淡蕩春老來幽趣更清新竹門松巷間臨水  
書几琴牀夔絕塵歸隱已無青瑣夢交游時念白頭人  
黃庭一卷消長日座有雲山未當貧

分携又是十經春喜見文章刻布新不待黃金論高價  
共憐白壁淨纖塵賡歌每憶同中禁名姓頻看慨故人  
國有賢王重耆彥從知道在不憂貧

次韻行儉移居

四首

移住城西半畝寬接隣俱是舊交惟中朝文采推王粲

別墅風流儼謝安應似詩人歌伐木會筵嘉客醉焚蘭  
新居更爲長年祝玉屑雲英好試餐

移住城西半畝寬喜於幽處託盤桓九苞威鳳人爭識  
五色華芝世共看流水清絃間屢奏秋風長缺未須彈  
也應晏歲勞相慰却愧陽春和獨難

移住城西半畝寬間居蕭散欲忘官隣園樹色青連屋  
露井苔痕碧映闌東觀有書秋後校西山如畫雨餘看  
同鄉同客兼同調日日過從得共懽

移住城西半畝寬  
相過隣曲盡衣冠  
南州文物終存古  
北地風霜屢涉寒  
萬里能無鄉井意  
數家相倚客居安  
匏壺載酒閒常會  
竹筭藏書也易干

隣居皆江右人

送王籌

汝玉之子

不見青城十五年  
春宮曾共侍經筵  
早乘鶴去歸三島  
應從龍游近九天  
海內朋儔悲益減  
客中歲月苦頻遷  
秋風又與王郎別  
爲話高堂重惘然

寄題盱江鄭氏隆壽堂

與君俱住西江上  
徃徃清名聽客傳  
六十生年同甲子  
尋常行樂似神仙  
厨供吏部曹中祿  
酒釀麻源谷裏泉  
盛世天恩錫隆壽  
龍光長照綺筵前

奉勅恭謁皇太子謝恩詩

有序

欽蒙皇上聖恩賜臣等拜謁東宮殿下敬惟殿下  
天章日表鳳彩龍姿氣宇雍容有廣大寬仁之度  
威儀恭肅有純和中正之資睿知聰明出乎天性  
所以係萬年之邦本所以正萬國之元良誠由祖



宗皇太后之洪慶皇上中宮之大德有以膺天眷  
之隆而生將來太平之令主也臣等深切懼抃之  
至恭各賦詩一章以上爲國家宗社下爲海宇生  
民之賀謹錄上進伏惟聖覽焉

華夷一統戴洪恩慶衍皇家萬萬春總爲太平隆景運  
正生仁聖福斯民德如文武成康繼世沐乾坤雨露新  
龍鳳之姿天日表大明高祖聖玄孫

送王東遜侍郎歸益都

愛子儒林冰玉清大廷文選佐持衡昔聞天語曾稱孝  
久侍經帷只用誠恩命已霑鸞誥重鄉人今看錦衣榮  
況逢青社烟氛淨共感皇仁說治平

午醒閒述

邊方喜迓翠華來風掃飛烟雨浥埃日暖營門喧鼓吹  
秋清廬帳引尊罍諸公並有平戎策賤子慚無奏賦才  
忽聽六軍傳好語龍輿今已辦東回

懷柔旅次 一生能執經請益

古樹蕭條蔭縣門  
縣前民舍似山村  
何如荒歉頻年後  
猶有承平舊俗存  
愛客別延林外館  
多情還倒炕頭尊  
不徒行役能相慰  
兼復詩書可共論

歸至清河

時彥諸公約載酒土城見候

二月隨鑾三月歸  
近瞻城闕五雲飛  
桃蹊深淺紅相間  
麥壟高低綠漸肥  
出郭故人期載酒  
迎門稚子候牽衣  
登山臨水多高興  
未抵抽毫侍禁闈

寄壽胡祭酒七十

八年不見頤菴面楚樹燕雲思獨懸寶氣常騰山浦上  
文光高燭斗牛邊綠尊酒共幽人酌錦字詩從過客傳  
七十韶華還七十重新甲子記流年

元宵侍宴萬歲山

五首

綠映鰲山近紫霄王正嘉節屬元宵九衢星斗珠燈燦  
一統乾坤玉燭調處處陽和融動植家家歡樂合笙簫  
臣民仰戴君恩澤萬壽齊天祝帝堯

寶炬華缸潏灩紅參差迴合聚夫容九重殿上春先到

萬歲山前月正中  
天意總看新歲好  
聖情樂與兆民同  
頻年邊壤氛埃淨  
況是田疇稼穡豐

帝德承天景運新  
三陽開泰布和春  
典章禮樂隆昭代  
玉帛梯航聚遠人  
致樂天倫承聖母  
均恩海宇霑皇仁  
太平元夕仙韶奏  
率舞蹒蹒總鳳麟

大地山川明景象  
連城燈火照笙歌  
月當華蓋杠前好  
春在蓬萊頂上多  
鳳闕光輝含瑞靄  
龍河浩蕩溢恩波  
時平幸遇唐虞主  
聖德無爲保泰和

詔書已下息黎元  
遠邇歡忻戴頌言  
節序適逢端正月  
陽春偏感聖明恩  
三山瑞彩明黃道  
五緯華星繞紫垣  
敬效嵩呼祝當寧  
太平天子萬年尊

送曹都御史赴甘州

繡衣驄馬引雙旌  
手捧綸章出帝城  
滿路桃花飛乳燕  
夾堤楊柳帶流鶯  
關西舊識霜威肅  
塞上今傳氛祲清  
昭代有才當顯用  
會看竹簡記勲名

寄楊壽夫

七十年華兩鬢霜九重恩旨賜還鄉脩成國史登金匱  
歸去官銜帶玉堂碧水丹山從散策春蘭秋菊對浮觴  
別來繾綣懷君子故寫琅玕遠寄將

歐陽貞外歸省以山水畫索題

去春我過蜀江曲今春爾望蜀江歸六一宗家有餘慶  
椿庭萱砌交晴輝旨甘猶是秋官祿繡錦新裁萊子衣  
一幅蕭閒鄉閭趣白頭相送念相違

送柴尚書歸浙江

萬里胡氛汎掃清中臺新拜夏官卿平生節比秋霜勁  
此日光添晝錦榮鄉國幾人乘傳入江亭八月看潮生  
錢塘蠨熟鱸堪膾誰共芳醪白玉觥

喜雨詩

有序

今夏自五月五日不雨至六月十八日上念田穀  
將實而生意枯瘁命有司致禱越三日大雨霑足  
聖情欣悅賜侍臣酒饌臣士奇預被榮恩喜而賦  
詩



好雨連朝蘇久旱無邊喜意動宸衷  
皇天洞鑒聖仁德  
臣子深慚變理功  
每念升平均九土  
已知舞蹈出三農  
駢繁寵錫身難報  
何幸衰年際屢豐

送王日初

撫州太守溫如玉  
自昔論交在兩都  
壯歲文章看擢桂  
明時勲業遂分符  
臨川野外春風滿  
華蓋峰前皓月孤  
邂逅相歡又相別  
天寒冰雪柰長途

送趙侍郎巡撫江西

聖主龍飛矜下土天官鵠立侍彤庭九重北面承親命  
一道西江仰福星吏治還應察涇渭農田須用去蝗螟  
使車所過從容駐留取甘棠久遠青

送陳教授歸臨江

臘雪都門三雨花廣文辭闕理歸車從來宦達心如水  
此去優閒髮始華瑟瑟薰葭寒景暮蕭蕭鴻鴈朔風斜  
碧桃開滿金川縣無限春光屬到家

送萬太守還嚴州

聖皇臨御求賢日太守趨朝奏最時興學已聞千里化  
愛民令荷九重知離亭雨霽花薰勻驛路風清柳拂旗  
繾綣同鄉又分袂好音頻慰別來思

送恂如侍郎循拊蘇崧

秋來為別思難禁況復平生契誼深循拊獨先祇帝命  
賢勞深見愛民心也知瑞玉須荆產信是長才出鄧林  
何幸遭逢明盛代春風行處散棠陰

送任敬讓主事省親

潞河二月春水泮河上仙郎載畫船金勒已頒褒命下  
繡羅新製舞衣鮮曉經鍾阜龍承日夕望豐城劍燭天  
白髮高堂榮具慶華觴拜跪祝長年

寄李昌祺

故人久別李方伯不盡交情憶洛中冰檠心堅真比石  
松筠節老不隨風共嗟祿秩縻三紀漸喜雲泉屬兩翁  
已辦這頭青若笠鷗江鷺渚往來同

送黃叔志布政致事歸吳興

拜賜歸閒出九重都門祖送雪寒中考功郎署三朝遠  
敷政藩垣二品崇金蓋雲山足怡悅鷗波亭沼更從容  
扁舟還約玄真子來往苕西與霅東

挽余正安

詞垣分手十年餘霜鬢蕭蕭未漸疎朱紱早辭金殿直  
草堂還傍碧山居一壺常共隣翁席四馬頻回過客車  
聞道翛然奄乘化硯松空對涕漣如

送樂善郎中梅

萬木凋殘春欲回  
年年開擅百花魁  
連松傍竹堪論契  
綴玉聯珠不染埃  
寒暑芳華清莫敵  
幽人風致數能來  
還應一段冰霜意  
宜向秋官署裏栽

遵化行營夜夢金少保有作

時奉使慶府

故人迢遞夢分明  
星轉周廬夜二更  
金馬玉堂三月別  
白雲紅樹兩鄉情  
關山道路瞻持節  
藩府衣冠迓擁旌  
奉使西行足高興  
錦囊歸日為君評

書張御史和唐詩後

有序

詩自三百篇後歷漢晉而下有近體蓋以盛唐為  
至楊伯謙所選唐音粹矣比年用力於此者鈔御  
史張楷取唐音中七言律悉和其韻可謂有志間  
出示余因取其首篇和以答之前四句以髣髴盛  
唐諸公之趣後四句特以勵楷詩雖學者餘事然  
昔人有曰若不能升其堂者非可易言也發乎情  
止乎禮義優柔以求之諷詠以得之造之方也  
勗哉乎楷他日聞浙水東以唐詩名者其子也歟

楷最乎哉

驪珠光彩玩堪憐  
白玉藍田生煖烟  
粲粲芙蓉出秋水  
蹌蹌金石奏宮懸  
從容柏府霜臺暇  
吟咏開元大歷前  
壯志盛年期努力  
方將洗耳伯牙絃

送原之參政歸山西

余以舊得夏中書墨  
竹贈別并題詩云

鳳沼春生翰墨香  
一枝晴翠寫瀟湘  
清安早濯薇垣露  
勁節曾凌柏府霜  
共愛鸞翔拂霄漢  
還思金奏協琳琅



匆匆相見難為別贈置微之君子堂

送杜御史山東參議

有序

孟清御史廉潔端厚持大體余雖素未識然聞之士君子熟矣今陞山東布政司參議始遂一見故作詩送其行云

御史班中第一流由來清譽重琳瑯儲無覩石門如水  
胃貯陽和面帶秋海岱藩垣騰寵命冰霜道路戒行輶  
十載同朝始相見篇詩持贈當吳鉤

送杜寧侍講

玉署十年登近侍，白雲滄海望天台。  
歸寧榮捧天恩下，行道爭看畫錦回。  
濟北九河衝暑過，浙江八月看潮來。  
升堂正及高秋節，丹桂吹香溢壽盃。

姚克脩御史挽詩

荆湖才行登烏府，念子于今第一人。  
節操從來烟冰雪，撫循隨處播陽春。  
陵夷古道傷心後，太息清風洒淚頻。  
最是蜀人懷厚德，不知誰復繼音塵。

題胡御史家四老圖

四人行共三百歲兄弟儼若商顏翁皎皎鬢華晴雪白  
怡怡容色曙霞紅松間步引仙巖鹿花外看回憲府駟  
南極分明當几席星光長映酒杯中

張鳴玉郎中父輓詩

蘭褱荷帶不言貧賸貯詩書遺後人祿養曾榮二千石  
壽筭高登七十春青山墓樹秋雲冷紫誥龍章寵命新  
尚有耆人說遺行至今清儉表鄉民

送徐良王侍郎復職還南京兵部

昭代多才少司馬中臺六載住南都  
揔攝自昔升梁柱瑚璉于今用瑾瑜  
天闕九重看奏最秋風八月戒歸途  
交情又屬匆匆別強對離歌寫翠壺

鄭侍郎父挽詩

人傳能孝似參騫儒行公才兩克全  
三邑曾承博士教庶民長誦大夫賢  
青山墓道松楸冷錦誥褒詞日月懸  
況有顯揚千歲託中臺五采鳳毛鮮

題雲山送蕭德葵南歸

一別桃源四十春  
高齋回首思紛紛  
清溪兩道通仙谷  
翠壁千尋護白雲  
少暇焚香時鼓瑟  
半酣停酒更論文  
何日承恩謝簪紱  
賓賓樓上再尋君

挽張逢吉

平生瀟洒湖海意  
晚歲寵召升朝行  
小兒皆愛秦扁鵲  
俠士亦讓龐安常  
可憐厭世忽已遠  
何限懷人今未忘  
鳳毛池上悲陟岵  
我為賦詩增慨慷

送魏侍郎奉使江西

西江寇盜本王民，命切艱危有弗馴。  
初拜殿廷承玉旨，肅將斧鉞下天津。  
道途陰曠須清滌，溝壑呻吟賴撫循。  
盛世長才當大用，勉宣皇武布皇仁。

送袁忠徹少卿歸四明

早從雲海識真龍，冠紱三朝侍九重。  
綠筆曾書丹鳳詔，玉章親視紫泥封。  
九河花落春波暖，千里鶯啼樹色濃。  
遙想到家明晝錦，越山晴繞翠芙蓉。

送何孟煥檢討歸會稽

詞垣榮被寵恩新  
朱紱朝來拜紫宸  
抗手暫違丹禁侶  
馳心長戀白頭親  
關山鴻鴈隨秋色  
江岸芙蓉映曉雲  
想見升堂嘉慶日  
銀餅滿貯洞庭春

送崔彥俊太守歸徽州

瀟灑宗之清似玉  
專城五馬翼雙旗  
政如召父南陽日  
教擬文翁蜀郡時  
京國三年重邂逅  
關山萬里又分離  
同鄉同道相期遠  
千載新安去後思

送何太守歸宜陽

豫章南上二王城  
宜水宜山繞郭清  
太守遠憑熊軾下  
老夫猶記鳳臺生  
三年北闕重趨覲  
正月東風遽戒行  
冰泮龍河春浩蕩  
臨分無那故交情

送彭參議致事歸崇明

榴花時節出都門  
語燕啼鶯綠樹繁  
近侍十年趨殿陛  
旬宣兩浙佐藩垣  
青雲高步承昭代  
白首閒居感聖恩  
冠帶光華動閭里  
清游多在海邊村



贈吳布政歸福建

昔歲京華聯近侍柴門相對日相過  
憲臺藩府升遷數西陲南閩越歷多  
冰雪滿懷知節操陽春行處想謳歌  
重來未盡歡娛意又送驪駒白玉珂

奉東宗載尚書

同鄉同歲還同道玉笋聯班歷四朝  
近曉天星俄落落經霜庭柏故蕭蕭  
廟廊特達升元愷海宇光華荷帝堯  
已辦從公舫樓底西江歸去狎漁樵

題南浦上人竹石

南浦上人冰雪意平坡古剎幽棲深琅玕翠拂曼陀石  
瑪瑙森立旃檀林虎丘說法曾點首玉版叅師今在心  
何時坐我清風側試聽海潮揚梵音

寄汴中廣哲僉事

手提文印中州去洛水嵩山歲屢經庠序育才元不易  
道途攬轡未曾停豈無賈誼閒懷策恐有堯夫隱在坵  
聖代咨詢憑使者封章會見達明庭

題吳郎中展墓卷

天官當代公衡鑒翼贊人推選部郎白晝鄉閭瞻衣錦  
青松丘壟豔焚黃天朝恩重何由報風樹情深獨自傷  
畫史能傳心曲事從知忠孝兩難忘

呈澹齋少保并諸學士

有序

二月四日澹齋置酒閣中會諸學士主賓七人而  
僕以最老預席顧桑榆之已迫念丘園之久違輒  
成五十六字以寫鄙懷用呈同席諸公云

無能有幸接英僚翰苑經帷共四朝時泰獨嗟年歲暮  
力衰轉覺道途遙風含御柳春猶淺波溢龍河凍盡消  
陽德方亨仁澤霈會容白髮返漁樵

挽曾暉主事父

釣水耕原計不踈娟娟脩竹蔭庭除家隣清節先生里  
案有蒙莊傲吏書閒對青山成逸趣遽傳丹旆引靈車  
明時有子光朝署寵贈終當貢墓廬

閒題

翠柏參差蔭滿庭  
雪晴青草傍階生  
門無車馬晝方永  
座有圖書心自清  
絳縣老人方並歲  
青州從事未忘情  
故園尚有漁竿在  
惟歎歸舟計未成

館閣真率會詩

曾聞東洛集耆英  
想慕高人物外情  
白玉堂中千載會  
紫薇垣畔七星明  
朝廷有道公多暇  
尊俎相娛老益清  
衰朽自知難並列  
擬循綠野看春耕

送裴脩謨歸侍親

早歲超宗有鳳毛  
天門金榜映宮袍  
官聯朝苑三遷後  
慶衍慈闈八袞高  
畫錦新榮當寧賜  
秋帆遙泝大江濤  
升堂拜獻長生爵  
更捧冰盤五色桃

送周員外致事兼簡巽溪長史

司成館下職頻遷  
一擢中臺遂十年  
官燭晨昏勞簡牘  
使車南北歷山川  
朝廷有道成高致  
冠帶無營勝散仙  
應共鄰莊楊長史  
碧松陰裏酌丹泉

送夏仲昭歸省

天恩初拜出皇州紅樹青山驛路秋  
鶴髮幾年違定省  
鳳池長日歎淹留穀亭水滿平通牖  
瓜步潮回穩放舟  
遙想升堂嘉慶日綺筵春酒玉為甌

題孫公器醫士梅竹

娟娟庾梅冰雪蕊脩脩嶰竹青琅玕  
梅熟兼鹽調鼎鼎  
竹老垂實來鳳鸞畫史高情真絕俗  
丹房閒對可忘餐  
董家豈乏廬山杏此植清貞經歲寒

吳叅政挽詩

初持彩筆趨龍陛遂入霜臺著鴈冠西蜀幾年分使節  
南閩萬里佐藩翰歷官中外賢勞久歸老林泉樂趣寬  
聞訃忽嗟成永別接隣空憶舊交歡

送陳遜用員外致事

聖主需賢贊萬幾省君未老決然歸十年朝署水霜操  
五色文林錦繡衣巖逕松蘿餘舊隱海天鴻鵠遂高飛  
白頭別有相知者潦倒不歸傷遠違

送太守劉永之荊州



丹桂飄香滿玉除  
秋高雲淨鴈來初  
朱衣拜別雙龍闕  
皂蓋行乘五馬車  
天子勤民需召杜  
郡侯為政用詩書  
荊州況是頻荒歉  
急待陽春惠化舒

送尹自道太平同知

霜華初滿碧梧枝  
貳守之官彩鷁移  
宦績十年勞撫恤  
客途千里厭驅馳  
江清米石長宜釀  
雪淨青山足賦詩  
此去殷勤宣上德  
太平民物總春熙

送周參政赴福建

有序

工部郎中鄱陽周君廉慎君子也奉國愛人明於  
大體獨恒不得於其長官蓋所存所由之不相契  
也皇上親擢為閩藩叅政賜之璽書勵其職業朝  
士大夫皆為之喜余與之同出江右故作詩送之  
五色天書照紫泥曉承玉旨下彤墀薰蕕自昔嗟同器  
鵬鶚于今喜及時遷迤桂香迎驛路飄翩雲彩動旌旗  
太平勲業資才俊莫負清朝聖主知

時彥行儉習禮入山觀玉泉想見佳致故作詩

奉寄

萬頃西湖一鑑澄，玉泉滉沸瀉泠泠。  
昔年兩度游曾徧，此日三賢興共乘。  
石畔漱流仍命酒，山中淪茗定逢僧。  
從知登歷多高詠，還對蒼崖第幾層。

宴楊氏南園并和

二首

楊家別墅南園好，水色山光畫障開。  
花連杜曲東頭發，人自蓬山頂上來。  
共傍林塘分綺席，頻教絲竹送瓊盃。  
盡日香風清不斷，披襟何處得纖埃。

南亭北似東亭遠三月好花無數開一水繞園如練淨  
羣峰當座送青來清歌屢引蹁躑舞高興頻流漱澠杯  
歸路斜陽擁車騎淡雲將雨浥輕埃

夏日館閣假寐夢澹菴寫竹筆勢翩翩以求余  
題覺而有作

日長假寐圖書府夢見揮毫寫竹枝三月都無鴻鴈信  
九霄如睹鳳凰儀空憐意悵闕飛動亦擬詩成寄別離  
淇水湘川渺南北清風翹首已多時

夏日館閣賦東馬學士曹侍講

九重盛夏淨炎氛  
停講經帷已二旬  
館閣退朝無一事  
衣冠坐論只三人  
大官致饌循常典  
中使傳宣錫異珍  
視草堂前新雨過  
錦葵承日不勝春

題畫寄遠法師

久別山中遠法師  
春風洒落鳳凰枝  
八窓花雨譚經處  
一榻松雲入定時  
出世人高了元法  
名家我識惠休詩  
幾時同坐曼陀石  
淪茗焚香慰所思

聞遠法師新作山居

從知城市厭塵凡近傍西山草結菴心靜故思幽境住  
道高不遣俗人叅玉泉洗鉢時分礪石匱藏經別在巖  
簷蔔繞林花似雪飛香常滿佛前龕

次韻答遠法師

詩成粲粲素霞開比似花光月映梅色相已清猶是幻  
性根元好不須培堂中明鏡常澄澈天上浮雲任去來  
盛世叢林數耆俊遠公端合斗間魁

送何文淵

二首有序

吾友刑部侍郎何君文淵於愛君恤民志如金石  
且其高才遠識無所施而不宜而遽引疾得歸於  
別也予尤不能無情故賦詩二章送之

曉承恩詔出皇京行李蕭蕭一葉輕  
梁柱榱桷希世有雲霄鴻鵠使人驚  
從來政挾陽和布況復心涵秋水清  
共憶江鄉今獨往都門分手若為情

我重何卿過瑾瑜清風素節有誰如同鄉同志寔知已

直道直言多啓予聖主方今圖致治長才安得遂閒居  
到家漸及陽和候春鴈來時應寄書

追和周侍郎大雪賜宴詩

有序

宣德己酉正月大雪皇心悅懌賜廷臣宴時周侍  
郎有詩後五年出示索和追念天恩不勝感愴勉  
次韻塞責云

先朝瑞雪兆豐年一體君臣喜可言已勅大臣頒玉饌  
更宣中使出金尊傷心何處攀仙駕洒泪清詩憶舊恩



滿目當時肱股在共攄忠懇答乾坤

題竹寄曾士弘郎中

朝紳歸里絕塵事愛爾廉聲達兩京  
堂堂日慶慈闈壽棘院秋榮令弟名  
俗轍掃除無一跡芳醪閒暇盡千觥  
聊寄一竿淇上綠更看冰雪歲寒清

寄李學士

別來無日不思君渺渺燕山望楚雲  
到縣幾多知識在入門強半死生分  
鄉閭叙齒應皆讓子舍添丁或未聞

氷泮龍河候蘭楫須知同館重離羣

送宗載尚書復任南京吏部

又拜明恩下九霄駢駢四牡出河橋從知素志懷鄉邑  
且盡丹誠答聖朝氷雪曉行嗟老大關山南望向迢遙  
金陵已熟春前釀應有梅花候翠條

夢覺作

翰苑詞林雨露邊不才何幸接時賢故鄉迢遞六千里  
歸計蹉跎四十年寶勅恭承明主賜白頭深荷寵恩憐

行來夜夜蓬窓夢只在龍墀玉陛前

過沛縣悼顏伯瑋

有序

廬陵值夏顏伯瑋其先出唐魯公之後伯瑋為沛  
令太宗皇帝舉師北平所過郡縣皆歸附伯瑋度  
不支不出時惟一子在側預送之出走遂入衣冠  
南望拜自經其子不忍去父復還父已死亦死之  
事具國史僕於伯瑋有故過沛悼之

平生金石見臨危就義從容子亦隨千載河山遺蹟在

一門忠孝史官知故鄉住近文丞相先德傳從魯太師  
欲酹丘墳何處是離離芳草泪空垂

過匡南重悼正安侍講

王署聯官二十春超然歸去樂閒身醉吟麗句渾忘老  
坐對青山不厭貧經年江海魚書斷落日郊原馬鬣新  
惆悵仰高堂寂寂尋君不見泪盈巾

題梅贈顯仁劉脩撰

五年不見劉脩撰長在薊門勞遠思此日歸來重晤對

清風瀟洒舊襟期香和鼎俎春調膳影上簾屏夕詠詩  
別後看梅相憶處陽和獨擅最南枝

題竹酬顏仲平

有序二首

僕與顏仲平別五十有二年今年春歸自北京仲  
平見訪澄江之上僕適以事先出阻風雨於外夕  
歸尋仲平之舟已行矣悵快不已辱仲平留詩披  
誦感愧舊得黃中書寫竹用以奉寄并步仲平韻  
二章其一賦竹其一述鄙意云

移植成陰歷歲時  
虛心勁節幾人知  
臨風每聽龍吟好  
待月常看鳳翥遲  
嘉客頻遊蔣詡逕  
高情閒詠武公詩  
何時君子堂中坐  
共看扶疎霽景熙

五十年前握手時  
清懷雅度兩相知  
衡茅昨枉過臨重  
風雨深慚出迓遲  
剡曲子猷俄反棹  
市南摩詰更留詩  
高山素仰陳夫子  
冰玉于今見緝熙

與鵲稷別

落日蕭蕭江上寒  
臨江對酒不成懽  
君臣義重慚違久

父子情深欲別難  
春水白鷗閒泛泛  
烟皋芳草綠漫漫  
客程漸與鄉關遠  
回首天南何處看

挽歐陽洙父

家住烟霞蜀洲曲  
蒼蒼喬木百年餘  
讀書行義承先世  
流水青山護隱居  
榮養已沾烏府祿  
褒恩曾錫錦綾書  
浮生何必登耆耄  
誰有銘文載令譽

羅侍郎挽詩

金魚洲北相過日

前年春余還鄉汝敬自文江來訪留一宿而去

玉峽樓前執

別時

四月余北上汝敬先期於玉峽見候會食頃而別

匆促共嗟情不盡幽冥

遽恨見無期

別數月而汝敬捐館

尚存簡冊書成績不斷輶車賦

載馳

汝敬自陞侍郎奉詔赦兩浙民賦理甘肅寧夏邊餉

最是邇西來往數至今

遺愛後人思

汝敬遺績在峽西者最著迄今循用其法

送劉不息

有序

劉誠不息草意先生之孫也吾十五六時識草意

於海桑槎翁之賓席計其時不息始生蓋今六十

餘年矣不息純質可重舉進士下第入胄監今得



臨淮簿專理邑之馬政將行索詩孔子不為乘田  
乎曰牛羊茁壯長而已矣仕無崇庫一惟盡誠焉  
耳不息勉之

兩京相見屢經年束髮為儒到白顛恩命曉頒雙闕下  
帝鄉南望五雲邊夾河楊柳含清霧新水鳬鷺發畫船  
好及明時展材用臨岐為誦魯駟篇

送曾振新除潛江簿

兩家白下東西郭爾叔童年日往還進士憐渠繼鄉榜

除官復此出賢闕淮南曉棹沙邊月江上晴看雨後山  
榮捧恩書行素志莫將離思動愁顏

送道亨王侍郎致政還鄉

二首

平生操節比瓊瑤身荷天恩到五朝為國一心常耿耿  
歷官雙鬢已蕭蕭西人每見談仁政故吏頻聞誦教條  
獨恨相逢各遲暮白駒那復永今朝

蕭散高情早息機衣冠祖送出都畿六官守道如公少  
七袞辭榮自古稀沃野秋風黃黍熟長河春水白魚肥

不才苦被樊籠繫翹首冥鴻嘆願違

東郭草堂宴集

帝城南畔尋韋曲浩蕩風光三月中  
衢路塵埃過雨淨  
林園花樹競春紅  
主人置酒興非淺  
衆客題詩歡不窮  
一杯一曲日西下  
莫待銀蟾生海東

挽竹軒劉嘉會先生

閒占雲霞隱鹿門一朝厭世隔囂喧  
儒林共惜斯文喪  
鄉邑誰知古道惇  
鵬鶚登庸誇令子  
文章為縣見賢孫

何時歸到螺川上為瀉椒漿奠一尊

送廖教諭自謙之任沅江

平生孝友江鄉重一別蹉跎二十年  
紫誥新求盤谷里烏紗遠上洞庭船  
秋風秔稻家家熟楚水鰱魚處處鮮  
想見齋居倚脩竹絃歌長滿綠雲邊

送周崇式貳尹赴東莞

河梁秋葉墮蕭蕭送客之官道路遙  
淮上月明朝正滿嶺南霜下瘴全消  
從知苦學持先志會有忠謨達聖朝

邑宰于今望賢佐過家少駐木蘭橈

贈本深還吉安

宴罷瓊林酒一盃鞭催五馬出蓬萊金章紫綬恩重拜  
皂蓋朱幡喜復來帶得一天新雨露掃除九邑舊塵埃  
螺川城外人千億爭看神明太守回

七言長律

公安王氏慈壽堂

堂中壽母八十餘慈顏和悅身安健俯看蘭桂春繞膝

坐聽詩書喜生面  
慈竹陰濃雲密垂  
護草花齊錦相炫  
地近荆潭泉可釀  
門倚荆江魚足饌  
甘味時邀隣媪同  
輕軒晴涉家園徧  
玉堂祿養共所榮  
錦誥恩封會當者  
耆耄爭看人瑞好  
康寧本自皇極建  
中天南極一星明  
歲歲長年照華宴

挽趙尚書

五朝遺老今無幾  
卓犖高才不可羈  
欽恤晚承虞帝命  
旬宣早出縉雲司  
中臺優秩升圻父  
三禮清心慕伯夷


屢挾地仙窮眺覽更携田畯看耘耔甘從白首辭官去  
曾以丹衷結主知竹簟茅簷真散逸藥畦花徑足栖遲  
過從每憶頻開醞朝退兼懷共論詩一別三年遂終古  
無由持紼送靈輶

聯句

夜夢與故晁菴胡公泛舟自鷗江至鷺洲對酒聯  
詩公起首句余續第二第三句公續第四第五句  
余復續第六第七句公結末句既覺而忘第五至

第七三句愴然懷舊因補之如左

金螺瀟洒對芙蓉鷺渚魚洲窈窕通  
遠樹白雲秋色淨  
故人清興酒船同  
河山夢冷謳吟後  
生死交深感慨中  
猶想勝緣如夙昔  
並騎黃鵠過江東



東里續集卷五十九



欽定四庫全書

集部

東里續集卷六十

詳校官檢討

臣

羅國俊

中書

臣

劉源溥覆勘

總校官進士

臣

楊懋珩

校對官中書

臣

范鰲

謄錄舉人

臣

呂日永

欽定四庫全書

東里續集卷六十

明 楊士奇 撰

詩

五言絕句

岳陽樓

城上岳陽樓高臨洞庭水君山望不迷日日風波裏

尋蔡胄不見

空復出城來問君還城去寂寂掩雙扉憶君情不叙

殘寺

殘寺連農舍空窓露佛燈四圍無古木那解隱高僧

示鵷兄弟

有序五首

不得鵷姪書數年近寄絕句五章亦言其志因便  
次其韻示之首二章余自述三章有懷思貽止齋  
二兄晚歲過從之樂四章勉鵷末章并勉鵷兄弟  
於學吾今六十有五七千里致此數語亦不薄幸  
諸姪各自嚮進如侍兩翁就奉呈一咲

身戴君親德何能一粟酬蹉跎今白首行邁尚悠悠

飯牛先壟下夙志未消磨恩重身難去非關戀玉珂  
二老東西郭風期晚益親將車數來往遙憶似荀陳  
待制傳宗嫡元孫見可人承家在好德切莫厭清貧  
愛身如白玉為學趁青春須識潛魚躍還思屈蠖伸

題畫

海天秋似洗渺渺淨煙濤忽露珊瑚樹還看翡翠毛

題竹與妻弟郭志善

溪上娟娟竹年深百尺餘何時過溪上折竿釣溪魚

清夜

清夜坐庭階薰風拂楊柳  
仰首望天河微雲翳南斗

題畫

二首

老樹不為材新林鬱蒼翠  
矯首瞻西山朝來有爽氣  
溪上帶清峰溪邊滿芳樹  
誰傍白雲居猶軫青雲慕

題竹寄友

三首

昔在詞林日同看翠玉枝  
好風清不斷曾結歲寒期  
霜節亭亭直凌雲發采章  
春風和煦日親見鳳鳴陽

平安常有報徑造豈無期萬里相思意為歌淇澳詩

題畫

士有不遇時放浪遺世情彼哉七君子亦未泊其情

題劉英竹

二首

高崖入煙霧下有清泠淵青鸞雲中來照影故蹁躚  
湘靈動雲根散作霏霏雨濕重翡翠毛涼浸珊瑚樹

題竹贈鍾子勤太守

歲蕤鳳凰羽白日動毵毵臨別遙相贈清風五嶺南

題槎翁畫龍 二首

卷六十

天下文明日雲從隘九霄歸田需需澤同幸際皇朝  
往歲尚書履排雲到九關歸來石臺下猶記寫龍顏

題金侍講所藏趙仲穆畫馬 三首

粲爛五花駢軒昂八尺龍惟應天廐裏得似畫圖中  
曉日立彤墀光輝玉仗齊朝回長散誕流水綠楊堤  
養育天閑久常懷萬里心太平無用武自愧主恩深

到桃源黃學士舟已先在南岸不得相即相望

悵然

隔水不得語中腸千萬迴知公望我至如我望公來

清河縣調公素

暮出清江肺夜投清河口明日到桃源誰家問沽酒

夾溝

晴日烘綿花暄風吹豆莢九月似春天河邊見飛蝶

離磚河驛十里阻風

白浪高如屋停舟日已中長蘆望不到愁殺石尤風



行營鑿井得泉

鑿井得泉水清冷碧照人銅瓶罷遠汲稍解僕夫勤

沙城

昔歲城中過曾遇江南叟身老意蕭閒寧知今在否

始乘馬

歲餘不乘馬今朝還據鞍眼昏身力弱心怯道途難

望雞鳴山

雞鳴山下路危險曾經涉今日望雞鳴未度心先怯

度雞鳴山馬上口號與同行者

蜀道天下險王尊叱其御何況雞鳴道今隨六龍度

雨晴

東方明月上雨止風亦罷仰荷蒼天仁俯惻行路者

渡河

騎馬渡河水馬渴未即渡飲足不須鞭騰踏長嘶去

問唐孟高需枸杞

與卿俱七十卿有好顏容此後詩相寄須兼枸杞封

自新河迤南道傍官宇鋪舍皆一新知是府尹

李庸所作賦二首

道途廣且平亭館皆輝煥追憶舊行時驚喜還嗟嘆  
府尹才能好經營次第新相知已心熟猶問路傍人

題四時花鳥四首

曾聞瑤水上千歲一開花常有雙青鳥何非阿母家

右桃花雙青

往來傍蓮塘飛鳴不相離比似兄弟心相親不相棄

右荷花鵲鴿

天香浮玉露金色艷高秋誰似雙栖者相依共白頭

右桂花白頭

的的王梅舒凋翠禽哢參橫月落時惆悵羅浮夢

右梅竹翠鳥

題弼姪飛鳴宿食四鴈圖

萬里塞垣來孤飛不成陣無那閨中情憶得邊頭信  
肅肅葭菼暮聲切為離羣情重連枝者單居不忍聞

霜落洞庭渚江南九月秋稍違關塞遠適足稻梁謀  
聖化行萬方江湖無射宿淡月映蘆花平沙睡應熟

題弼姪山水

有序四首

姪子之夔赴任吳江客有寫雲山四幅贈之者為  
各題一詩皆實意寓焉講授之暇時一展閱亦足  
以慰離別之思

齋居無俗事清眺擅吳江水郭團農舍柴門繫釣艫  
天涵洞庭水雲帶洞庭山永日談經罷憑軒一解顏

故國嘉山水文溪帶武峯披圖思不盡親舍白雲重  
家住清溪上山光滿竹林共憐簪組累徒繫故園心

題扇寄余正安

倭麻來海外裁扇劇清真還憑玉堂筆寫寄玉堂人

悼昔時

昔在南京時共玩朱櫻樹今日對朱櫻故人渺何處

題平川方子宣松石圖

松懷冰雪操石有堅重姿書齋日相對可以勵操持

便面小景

青青溪畔山湛湛溪中綠窈窕亭上人聽歌采蓮曲

千葉芙蓉

露冷蓮房老迎霜燦爛開誰是看不足剪落片霞來

單葉芙蓉

霜落荊州冷青菸度渚宮西人吹忽散孤影見愁紅

題蕭貫竹

蕭生讀書處有此雙琅玕永日吾伊靜晴空看翠鸞

題子昂竹

吳興八法精作書如刻玉蘭亭揮灑餘見此瀟湘綠

題卓廸山水二幅

二首

溪水清於玉山光淨瀟洒亭下有扁舟時看往來者  
青山草廬下蕭散絕纖塵曳杖彼誰子知皆塵俗人

雙禽圖

二首

莽蒼疎林下雙禽相因依終然自得性何必上林飛  
雙棲平野間弋者無所慕何限放浪才自得蕭閒趣



題蘭

芳馨在岩谷自與衆卉異必有君子人共結金蘭契

題梅

不但魁衆芳高潔無比儼商鼎論調羹何曾及桃李

題竹送彭冲還西昌

二首

京華春雨後竹館話分襟鄉邑何時至因君想故林  
送別長干道晴風翠羽繁平安千里意贈爾報鄉園

題宋檢校古木竹石

剪落珊瑚枝秋光淨於洗醉眠瑪瑙坡看舞青鸞尾  
題畫魚寄表弟陳孟高

外氏老賢弟迢迢憶孟高江湖魚尾赤念爾更勤勞  
題松

山中多歲月白日起蒼虬但適棟梁用那無匠石求  
題竹

鳳池八法筆寫此翠琅玕六月不知暑庭中生夏寒  
題梅

萬卉凋零後梅花開滿枝由來冰雪操橫笛不妨吹

題畫魚贈陳憲南歸

士之未得志勤力務所學亦有變化時禹門奮一躍

題邵武經歷梁永蒙蘭

三首

肯過柳溪上每尋蘭墅春芳馨揚素彩夢想故交人  
邵武諸侯幕光風動石闌時清吏牘少吟咏對芳蘭  
蘭芷生幽谷花時自在春軒墀移植好防有折花人

題竹贈士鼎南歸

月池池上路誰種碧琅玕自有虛心在青青到歲寒

題蔣壻重竹

二首

種得簞簞玉庭含五月秋清詩吟衛武絕勝伴羊求  
兩京四十載迢遞夢家林蕭散五君詠山王空愧心

題郭之信梅

二首

家住冠朝里官為真定師梅花當講席相對認南枝  
詵詵來學者晨夕侍臯比花共人如玉清香滿絳幃

題梅送曾訓導

有引

訓導師範職也其道自正已始所謂正已而物正者也吾里曾生得揚州府學訓導將之官以寫梅求題是以致丁寧愛望之意邑學周生閒暇往還可同一觀

至性存真操娟娟冰玉清齋居坐相對永矢歲寒盟  
題曾儀鯉魚

曾承姜氏孝亦載琴高仙今朝與子別早晚待書傳  
題蕭壻承恕竹

家住桃華源庭無俗塵至春永風日清高空玩寒翠

夾溝 二首

孤蓬雨蕭蕭滯風仍滯淺時復問同舟彭城今近遠  
河流淺且隘十里九折灣徐山望不見幾日見淮山

題驛舟中小畫

雙踏枝上雪查查鳴未休非闕浪報喜來歲足來年

題竹贈閩士且却其繡段 二首

組繡出閩中由來習俗工何如此君節葉葉是清風

種竹隔流塵清陰滿戶庭自公有閒暇常對歲寒青

恤旱

有序五首

亢旱數月加之蝗災畿內蓋甚詔選廷臣清理兩  
京及四方刑獄䟽其滯而辨其枉不及半月北京  
之獄䟽辨過半傳頌載道甘霈允再耕者大悅於  
是臺憲言致旱之由緊劾朝臣而潔穢清焉皇上  
仁明詔悉寬貸惟嚴貪者之戒僕雖苟免臺論然  
祿厚無補敢忘循省輒賦小詩五章畧紀其事且

識鄙意云

夏熱不可觸飛蝗遍野縣官有程期愁殺捕蝗者  
亢陽三月餘詔下寬刑獄囹圄半空虛甘霖稍霑足  
臺章論致旱緊斥政事臣涇渭無分別包容荷帝仁  
聖主勤恤民貪夫昧罪已天聽豈不近駸駸未知止  
官廩之所儲農力苦不易變理無寸能素餐重憂愧

寄時勉

三首

時勉陞太學之三曰僕懷別不已夢中作遙字韻  
詩既覺續賦一首案上適有寫竹一幅就題奉寄



東閣歡娛地朝來遽寂寥賢關一步近悵望玉人遙  
每日文淵閣閒思李翰林不知遷太學誰共坐論心  
欲贈歲寒意託之淇上竿亭亭君子節長似玉堂看

寄李祭酒

二首

端坐司成館高懷今若何向來石渠署無日不相過  
卧病無塵事其如離思何春風勝舊識時復一來過

題和姪枯木竹蘭圖

自在疏林下幽香滿露叢相依君子竹葉葉是清風

題楊紹林竹

本是淇園種森森枝葉開清風常自愛莫

闕

題畿姪孫梅

陽春第一花箇箇冰玉質真此讀書窓清香滿芳帙

題徐孚竹

瀟湘萬頃秋淇園千畝綠幽玩何須多一枝清已足

題蘭四首

愛此竹林下秋蘭花正開采芳思共賞有待故人來

懸崖秋氣爽蘭葉露溥溥誰把霜毫寫清芳耐久看  
磊磊澗邊石猗猗蘭作花光風一枝拂香滿杏林家  
熙熙春日暉九畹正芳菲劍佩歸來晚幽香襲人衣

六言絕句

題蔣院判墨竹

石面苔文綠徧林間竹色青垂二月東風吹雨陽和發  
育當時

輓李處士

二首

鄉里共高淳朴朝廷游錫褒封康寧九十餘二歸然雪  
嶺青松

白髮身全諸福班衣懽繞十孫最是鳳毛五采明時翺  
翺高騫

題竹贈士振南歸

清風林下歸客明月池頭故家杏樹百年喬木芸編累  
世生涯

絕句 二首

客程行及半月春色看分淺深楊柳乍舒河北桃花開  
遍淮陰

淮上天連芳草江南雲湧清峯瓜步春潮落日廣陵煙  
樹殘鐘

七言絕句

九日陳士良宅玩菊次韻王潔齋菊有醉楊妃

紫霞杯二種

三首

五日金門下直歸小園來看菊花枝千葩萬卉須臾盡

獨此相娛歲晚時

膩白輕紅數十枝  
半酣秋色倚東籬  
誰知彭澤歸來處  
更似昭陽宴罷時

紅白叢叢相映開  
一簫別捧紫霞杯  
滿含玉露香勝酒  
九日無煩太守來

吳孟勤為文贈黃都科南歸并為求詩

二首

楊氏昔來光德里  
黃端今去武昌城  
柳州邂逅永川遇  
並有文章託姓名

暫去還來不記年  
清朝又發庾樓前  
莫教折盡臨江柳  
留得重來好繫船

題仲舉梅花扇面

才子清姿如玉雪  
新裁小扇寫寒梅  
日長宴坐微風發  
為引幽香相逐來

訪蔣立恭不遇留書齋壁

門巷晴泥擁不開  
尋君北轉又東迴  
竹間寂寞香庭掩  
便似回船雪夜來

雨夜蔣立恭贈詩走筆次韻 二首

斜風飄雨還無定，獨坐耽書過二更。  
不似前宵鄰閣裏，聯詩便酒到雞鳴。

三逕篴簫二畝居，鳴風鳴雨稱清虛。  
秋宵一曲琳琅韻，為喜朝來向客書。

過城陵磯

磯頭水落石層層，石上魚樵半搭罾。  
忽望高樓出城郭，舟人指點說巴陵。



夜雨次韻寄蔡用嚴楊仲舉

二首

秋夜夜長長寂寂打窓飄雨似嚴更詩情未斷羈情起  
不耐牀前絡緯鳴

江邊園裏擅幽居清酒香茶夜不虛定是不聞風雨發  
半酣高詠漆園書

答蔣立恭

立恭約予同謁乃父隱翁之墓予  
病不果行明日示詩次韻奉答

憐君拜墓不勝哀淚灑東風奠一杯芳草青煙寒食節

幾家墳上子孫來

題祝教諭梅

絃誦初停子佩閒  
梅花香拂絳帷間  
玩微獨對羲圖坐  
不假重熏金博山

題蕭建平扇

五月樓船海上歸  
種魚池畔足閒時  
白羅團扇揮炎暑  
重理殘書莫下幃

題蕭德贊四時小景

四首

二月山花如錦開  
亭中坐對正徘徊  
蹇驢又有過從者  
童子相迎戶外來

雲林六月不知暑  
溪上好山如越中  
咫尺茅亭異華屋  
逢迎俱見古人風

兩行鳴鴈分飛處  
一箇輕船逆上時  
藉是江天好吟景  
不令風物動秋思

十日北風吹大雪  
閉門無處不漫漫  
江頭艇子船頭騎  
有底忙時不畏寒

題高克恭墨竹

有跋

房山高韻五十仞松雪清風二百年山齋寶氣不可掩  
夜夜雨虹光燭天

高嘗云息齋竹真而不妙雪松竹妙而不真吾乃  
於二者之間著筆然高甚少作竹或問之曰不欲  
以掩息齋雅度如此因併志之

齋宿和胡光大庶子

二首

金門晚退坐清齋燭影茶香對好懷况復連篇寫珠玉

右坊傳送左坊來

雨氣霏霏壓篆烟坐消銀燭未成眠  
明朝預想南郊上日馭光華麗滿天

題子昂畫嘉禾

宋代王孫元閣老文章萬丈貫天河  
胸中不有調元事那解揮毫寫太和

寄賓畿老弟

三首

安州貳守時名重清潔持身玉不如  
莫逐沿流同泛泛

須知涇渭本來殊

紫陌紅芳映日鮮  
須臾榮落亦堪憐  
長山絕谷青松樹  
解閱風霜過百年

古人貧賤揔清高  
賢弟殷勤慎所操  
詩書教子光先業  
勝貯如山金錯刀

題海天秋興圖 二首

瓊臺太守彈琴罷  
觀海如觀太極中  
遠水長天清一色

悠然心境共昭融

先生嘗教學者  
觀心於太極云

已共安期汗漫遊  
海天空望白雲秋  
驂麟跨鳳知何處  
應在三山與十洲

題畫贈德遜南歸

二首

花落江南清浦香  
春潮灑迤送歸航  
九華繞過匡廬出  
看遍名山到故鄉

我昔金魚洲畔住  
雲山清滿舊柴扉  
君家只在鄰東曲  
多釀松華待客歸

寄題浮梁環秀亭

地偏瀟灑一塵無水色山光繞畫圖他日乘風遡南斗  
李家亭上看蓬壺

楊自然處士輓詩

二首

不慕清名達九重全家長住水晶宮  
芙蓉為帶芙蓉佩賸有人傳惠濟功

平生心事聽皇天流水行雲任自然  
養得鳳毛成五色青雲白日看飛鳶

書周益公所題湯氏別業



不將出處間心期鄰里無時欵竹扉傳世文章高世節  
湯家千歲有光輝

題李處士畫

一去城中竟不歸閒依泉石謝塵羈世人誰不知名姓  
時有扣門來請醫

送楊誠都事赴山西

二首

郎官湖上先生宅十五年前共酒樽今日都門重邂逅  
令人腸斷郭東原

花縣幕中留惠愛銀臺初近御爐香又承寵命超遷去  
馬首青山望太行

輓劉仲海

三首

心如明月湛孤圓掃石看雲度歲年家在吉陽城裏住  
未曾輕到縣門前

竹窓幽戶久棲遲不道無官枉盛時綵筆長書五花誥  
大兒身到鳳凰池

文水仁山映角巾常年書社會比鄰如今又及嘉平節

省賞梅花少一人

題舒有常畫

河陽縣裏花爭發  
彭澤門前柳正繁  
公暇小亭無俗吏  
坐聽流水出松根

題竹

雙玉亭亭翡翠毛  
春風晴拂綵雲高  
也知結實須來鳳  
即遣為竿合釣鰲

題竹寄曾東銘先生

鄉里相違五十年喜聞歸隱得幽偏一枝遙寄琅玕竹  
為愛風流向阮賢

送家兄及妻子還鄉後感懷三首

十月十五日

少小情親弟與兄老來兄弟更關情五年一見頭如雪  
無那秋風促去程

家在西昌舊業貧孟光歸處重辛勤十年茆屋秋風破  
獨自牽蘿補白雲

迎門兒女咲牽衣每日中庭候晚歸今夜片颿何處泊

應同阿母憶京畿

輓顏子明

五首之二首

曾吟楚些招顏谷  
淒愴傷情久不堪  
忽復悲歌動行路  
愁雲深鎖萬松菴

文淵閣下集羣英  
清世才華重老成  
大典已傳名姓在  
光榮終不負平生

送皚上人住持建昌太平興國寺

二首

持鉢王城住幾年  
袈裟新汎上江船  
禪心還似江心月

江自東流月自圓

迢迢盱水映禪關水上浮雲意共閒  
講罷楞伽無一事  
旃檀樹裏看軍山

楊補之掀蓬圖

玉節歲蕤導羽麾香風吹度翠雲涯  
披圖彷彿如曾見  
江上孤蓬歲晚時

送人歸故鄉

江花江柳送船開燕語鶯歌喚客回  
舊屋歸來春未晚

青山如玉水如苔

題蔣院判小畫 二首

一卷深護紫苔文  
喬木踈篁翠拂雲  
却憶江南秋雨霽  
東皋亭上倚微醺

老氣崢嶸冰雪榦  
清風瀟灑鳳凰枝  
相依共矢心如石  
應得論交晚歲期

輓劉榮甫

八十已過將九十  
翛然物外等閒身  
繡林山水堪怡悅

太息清風減一人

平生孝行何人繼  
不受遺金世亦稀  
歲歲朝廷賜牛酒  
于今寂寞掩荆扉

埋玉荆山松栢地  
百年身世返空虛  
傳家尚有闕  
瑞  
翩翩朝陽五色雛

題梅寄友人

冰霜同是歲寒心  
回首江南間濶深  
尚有風流何遜在  
水邊籬落待重尋



十月二十五日夜連夢紉女

未離襁褓學踉蹌  
遠別憐渠意不忘  
昨夜小窓頻入夢  
計程知己過南昌

五馬朝回圖為贛守題

二首

翠玉樓前春欲遍  
湧金門外水長清  
使君為政清如水  
五馬歸來十縣迎

正月朝天三月回  
連翩飛騎蹴浮埃  
駟車不獨諸侯貴  
遠道驛驕總逸才

題畫

倚天萬丈碧崔嵬  
水霧林霏濕半開  
何處春山獨乘興  
蹇驢騎度礪橋來

從子鵷以其兄相之喪及妻子歸故鄉因示三絕句

六載天涯一度來  
匆匆臨別復徘徊  
汝身長大吾衰病  
相見從今更幾回

庭樹森森照眼明  
一枝如玉竟先傾  
傷心我已腸千斷

何況衰年父母情

憐爾驅馳重急難  
荒原風雨鵲鴿寒  
孤兒寡婦堪愁絕  
好與殷勤別意看

送山東蔡運使

家在淮南萬竹林  
十年薇省對嵩岑  
離臺此日觀東海  
應說皇恩似海深

題梅竹贈郭子成還北京

二首

貌得春風玉一枝  
使回清氣滿青驪  
過江還遇江南客

莫遣披圖動所思

昔在江南種竹枝十年離別重相思  
春回已是冰霜後白日青雲見羽儀

題荷花便面

深翠羅裳紅玉臉精神秋水共娟娟  
西風長浦斜陽外慣倚蘭舟詠采蓮

寫扇寄劉昇

不到珠林五六春閒窓書卷故殷勤  
別時看種庭前竹



遠想長枝已拂雲

簡冀成

楚水吳山久別離  
每因嘉節重相思  
今來一處稀相見  
何必思情勝昔時

龍洲姚老人獻山薯土瓜獲受恩賞臨歸乞詩  
走筆書三絕句

老際清朝戴聖君  
山林幸作太平民  
乾坤莫報生成賜  
萬里金門拜獻芹

野服清晨謁九天承恩親拜玉階前歸來感戴心無限  
但祝皇家萬萬年

南平橋外澄江畔畊鑿生涯樂有餘又說龍洲將過縣  
寄言鄉邑務詩書

送中書舍人陳彝訓赴北京

三首

北京巡幸戒春時扈從千官樂載馳惟有鳳凰池上客  
承恩先去候鸞旗

綵筆喜辭西掖去畫船遙向北京行黃河十月無冰結

千里長風幾日程

紫禁遙連萬歲山  
明年思爾珮珊珊  
龍文五彩騰雲氣  
應向黃金臺上看

簡謝太常索竹栽二首

新啓南軒面碧漪  
櫻桃雜樹滿堦墀  
凌雲尚少琅玕竹  
分我仙壇十數枝

數枝聊可玩清華  
盛夏終須翠滿家  
矯首容臺候青鳳  
明朝好日莫令賒

寄允文度

四首

湖海交遊二十年憶聽流水奏朱絃情深未逐浮雲散  
長夢春風玉樹前

東城踈雨洒花枝同醉洪山寺裏時楚客猶傳舊題句  
漢南清景不勝思

蚤識文章五彩多六年離別思如何武夷九曲行應徧  
想見臨清寫棹歌

聞說重來謁九天朝回歸騎忽翩翩城南旅館無尋處



遙望閩雲思渺然

題畫寄羅孟昭

二首

龍池之北臨古城金華千丈當軒楹十年不向北齊去  
無那看圖勞遠情

茆舍疎籬護土堦石梁流水綠於苔吾家東里真相似  
曾擬歸時候子來

彥強將歸麻陽雨中見過話舊出小畫求題就  
以識別并問訊叔處

二首

麻陽貳令重來日共話家林畔讀時碧水蒼山未歸得  
京華春雨不勝思

兩度相逢皆草草臨岐無奈別情何沅陵更有劉明府  
頗恨歸時不肯過

贈金諭德從子驥

驥英年好學今將歸省來乞言為賦  
三絕句識願望之意并問訊幼孚云

斑衣歸去奉庭闈更祝重闈千歲期此樂人生須  
還將餘力務詩書

紅杏丹桃相映開一朝風雨化塵埃  
須知廊廟為梁棟只選南山松柏材

爾家仲父才情好別後三年未得書  
玉筍金川有真樂青燈黃卷近何如

答胡學士

胡學士在北京閑余病寄詩慰問依韻奉答十首之三首

卧病幽居况獨居愁來何物可消除  
一緘遠寄千金重賴有文淵學士書

以病文園寢不安床頭頻展寄詩看  
深情宛轉勞相慰

香墨淋漓故未乾

常秉清忠報大廷年華流水忽心驚知公未戀滄洲曲  
相對金螺看晚晴

同文度冀成秋夜有懷從善仲舉

二首

靜夜聊為江上吟江雲漠漠水沉沉惟應黃鶴樓前月  
照見離人萬里心

江邊寂寞顏回宅城裏迢迢張仲居想見近年塵事絕  
人來不寄一行書

題梅 二首

子勤得徐仲允寫梅花以遺子壻蕭季昶昶求余  
題是夜余齋宿翰林夢家園梅花甚盛覺而有懷  
因賦此且致期勉之意云

白鷗江畔金魚浦草閣柴扉是我家昨夜玉堂清夢到  
還臨流水看梅花

春坊中允寫瓊枝正是園林雪罷時莫訝相逢易  
娟娟冰玉歲寒期

閨贈

吉水王氏槐陰堂

二首

文江江上多喬木  
愛爾堂前槐樹蕃  
枝枝葉葉先人德  
長有清陰庇子孫

百歲蟠根雨露深  
秋雲散作滿庭陰  
詩書教子擢科第  
清時莫負花如金

題梅寄康仲穎

二首

憶昔焚湖處士家  
玉梅親拜丈人花  
冰霜晚歲全高潔  
閒映孤村碧水涯

分手花前又幾時  
舊家相好最相思  
才華共愛清如玉  
有使題詩寄一枝

自題竹林小像

時年六十八

落落江南舊布衣  
水邊林下靜相宜  
白頭更有浮榮繫  
自詠武公淇澳詩

送蕭德通南還

為憶雲林別帝畿  
淮潮相送去如飛  
扁舟想到仙源口  
流水桃花春未稀

別季雅 二首

予去彭氏館十餘年季雅相見京師夜談之頃愴然念舊之懷其歸也索詩為別因賦絕句 二首

一樂堂中坐絳帷青髭白髮勸銀卮  
今宵剪燭京華邸感慨重逢話昔時

明日張帆白下門秋風一月到鄉園  
何時解紱將書帙重問城南水竹軒

題竹贈武昌友人 二首



種竹西街幾歲餘  
枝枝葉葉散扶疎  
日長講罷歸來早  
應有新詩節下書

愛竹曾過孝感坊  
小齋清日聽琳琅  
鳳凰臺上今朝別  
不盡幽情憶武昌

題高教授寫竹二首

錢塘好易悟精微  
講說圖書衆所推  
塵掩韋編今寂寞  
惟因寫竹見丰儀

雲根煙篠出毫端  
遍灑文牋與素紈  
今日風光公獨遠

空餘遺墨後人看

題徐氏孝友堂

二首

堂上嬰啼五色衣  
堂前荆樹爛相輝  
流塵不到文江曲  
家慶湏知自古稀

家聯節孝先生譜  
堂有文安學士書  
具慶百年兼具翕  
人間一樂有誰知

負愆同蹇尚書金正字  
赴北京早發江東門  
十年叨祿侍詞垣  
材薄深慙負寵恩  
帝德從來天廣大

忍懷愁思出都門

靜海縣

九月無霜草木枯  
蒹蘆花白映青蘇  
計程共說金臺近  
明日舟行到直沽

候司直不至晚發濟寧

雲邊無處望歸驂  
一片離情逐暮帆  
猶待聯翩載黃鵠  
同吹簫管過淮南

題竹與謝進士

潞河撾鼓發官航使者衣含雨露香持贈兩竿淇上綠  
清風一路過江鄉

送盧知府歸杭州

二首時  
欲告老

澹蕩春風處處宜  
冰霜炯炯見操持  
九年文選行公道  
猶有興人說往時

聖朝宣化需賢守  
土屋茅欄望更深  
白髮未多身未老  
莫教泉石引鄉心

題竹贈常州知府

二首

陽羨郡中公事簡高臺五月帶霜寒  
脩脩數尺鸞鳳尾  
比似湘皋月下看

寫得淇園玉一枝清風元自鳳凰池  
毗陵太守多公暇  
坐對時吟衛武詩

題翠微丹房送劉道士還荆山

昨日朝天出翠微  
春霞五色繡為衣  
金丹還憶荆山裏  
一片閒雲相逐歸

胡原節陞大理卿復巡視浙江索詩賦四絕句

先皇昔御文華殿供奉曾霑寵命多  
白日鼎湖龍去香  
重來空有淚成河

嶺海歸來萬里程觀潮更上淞江亭  
昔時道路瞻駉馬  
此日車旗迓九卿

攬轡南乘使者輶秋風古道不辭遙  
豺狼掃迹瘡痍復  
須遣遺民感聖朝

行李蕭蕭去住輕霜臺柏府舊馳聲  
須教一道吳江月  
照見中流徹底清

送蕭雅容受誥後歸省

四首

新着香羅綠繡衣  
文江江上省庭闈  
龍章五色金為笏  
親捧皇恩萬里歸

夏官初滿擢天官  
文武銓除職任難  
誰似江西蕭佛子  
時人稱之清如水  
雪萬人看

京國相逢意共親  
心如秋水氣如春  
同朝同郡兼同調  
二十年來見幾人

玉露漙漙下翠梧  
薊門攜手惜離居  
娛親想及重陽節

酒汎黃花膾白魚

過滁州馬上口號寄陳廷器

長憶禮闈同事日  
錦筵官燭夜論文  
過城不見匆匆去  
回首滁山隔片雲

夜宿池河夢頤菴

久別豫章胡祭酒  
夜來夢見髻星星  
頗聞藥裏今拋擲  
應是文章屬老成

授散官二首



舊制除官後即授散官僕為學士五年始授奉議大夫蓋因吏部郎中陳宗問言凡外職皆不給散官時車駕幸北京而吏部遂以南京亦為外職不給授至是隨侍來北京始得蒙恩而當時外職雖布政使亦未有授散官者愧無補報用志二絕

五載金門為學士朝來初降散官恩幸因近侍霑榮命猶勝超遷典大藩

二十年中六改官論思匡輔古來難不才未有涓埃報

徒切區區抱寸丹

送崇厚歸鄉

二首

君家兄弟聯雙壁  
館閣懷歸次第歸  
想見吉陽秋雨霽  
江天鴻鴈一行飛

眼看科第擢英髦  
又見南飛逸翮高  
多病無能留滯者  
秋風相送使心勞

題竹贈人歸南京

紫垣東畔詞臣署  
曾種琅玕萬箇清  
一上金臺二十載

看圖長是憶南京

題樂山樂水二圖

二首

岱嶽巍巍萬古青  
奠安東國拱神京  
出雲為雨潤天下  
坐契仁人四海情

為澗為河萬折東  
周流無滯更無窮  
道人胸次涵流動  
樂與宣尼川上同

書鮮大紳作其兄墓銘哀詩後

三首

少年兄弟同金榜  
一日聲名四海聞  
更賜同歸侍親老

全家稽首戴天恩

紅芳庭館紫垣陰對酒論文夜向深三十餘年如昨日  
埋銘一誦一傷心

新詩字字皆愁痛不待勞心苦思成揚子江波深不極  
未知難弟憶兄情

寄示東城諸姪

二首

不才無計謝朝簪流水年光七十三盤古螺湖松栢地  
夢魂夜夜到江南

叨祿京華四十年老來一念在歸全故鄉無限佳山水  
何處松楸著墓田

寄昌平吳典史

二首

為問昌平吳典史到官民事近如何清時雨露涵濡厚  
想見豐年黍稷多

已聞贊縣清如水廨宇蕭條日掩關簡牘勞勤蓮幕下  
未應拄笏對青山

送蕭大慶之官始興

二首

始興庾嶺南邊邑博士之官喜過家廣海年來多驛使  
緘書頻遣慰京華

縣邑西連丹鳳山行藏有道聽皇天瘴煙毒霧皆休惑  
忠簡新州十八年

題蕭德贊竹

昔年曾作蕭齋客繞檻粼粼翠玉枝猶記凌雲軒上坐  
清風遠道倍相思

題蕭德贊山水

二首

昔年曾借蕭齋住流水桃華盡日閒讀罷黃庭更何事  
石臺散髮看青山

一去京華三十春鄉山萬里夢歸頻山中尚有平生侶  
應見題詩憶遠人

題蕭本器竹

二首

愛爾清淳比玉琳青春黃卷好留心林間石畔無塵事  
一寸光陰直萬金

爾家瀟洒自天台山繞溪樓石作臺老我會扶蒼玉杖

尋幽重度葛陂來

題山水與彥實姪

翠嶺岩光帶白雲  
林間溪畔絕纖氛  
須知樂志堂中坐  
長日書聲到夕曛

題劉梓人竹

滿林淇玉翠紛紛  
白日蒼苔夏絕塵  
好近五雲洲畔住  
翛然閒作太平民

酬友人寄酒



洞庭春色出黃柑遠致何由共一懽感荷多情王刺史  
獨慚彭澤未休官

過習禮檢討家觀菊不過留三絕句

習禮檢討家植菊過節始花而聞連日有遠客之  
擾今旦客去余造焉則主人皆往治職務惟兩童  
子導引至花所黃紫二色爛然可觀獨坐久之作  
三絕句留奉習禮宗璉時同居云

花開只在屋西頭常待看花散旅愁人事已閒天意好

無邊晴景屬清秋

短短垣牆不作籬  
傍簷背日故開遲  
好花正不論先後  
無事頻來坐少時

昔者柴桑早去官  
悠然把菊對南山  
若緣五斗能留住  
也到花時未得閒

鄒侍講以詩問錢檢討索菊而僕以詩并騎邀  
之二首

一室閒居俗慮清  
題詩問菊見高情  
何如解帶花間坐

莫負秋晴送馬迎

隣菊初花粲可觀  
花前棋局足盤桓  
尋常無事宜來數

即過城東來却難

時鄒將遷居東城

習禮惠翁以詩謝之并邀同賞

二首

蕭散高情絕世稀  
秋清分送菊花枝  
清香正色明窓下  
自與幽人晚歲宜

一旦秋芳粲滿家  
黃金耀日十三葩  
何妨拂袂來同看  
門外青帘酒可賒

子啓學士見過僕適他出不遇奉簡

三首之一首

病來愁坐愁無那強為尋醫蹇起行寄謝玉堂曾學士  
高軒相過不相迎

子啓見和再用韻奉簡

三首之一首

東里何如西墅清廣庭深巷足閒行近栽楊柳高於屋  
況復新來少送迎

習禮見和用韻奉酬并簡宗璉

六首之二首

愛君濯濯儒林秀每日趨朝得共行隣舍不嫌來往數

斲時相送復相迎

試問秋曹張主事公庭幾日未曾行尋常飽飯焚香坐  
客至何因簡送迎

題竹送族孫繼赴溫縣教諭

二首

吾家前代三登仕今喜孫枝有鳳毛但保歲寒冰雪操  
會看青步綵雲高

一官典教河南去持贈東風碧玉枝正好盛年崇德業  
日吟衛武切嗟詩


題菜有序

天下蒼生不可一日有此色士大夫不可一日無此味此宋人語也覽物忖心聊題短句

濫食大官三十載濟人饑歲一毫無園畦過雨青青茂但愛時和似畫圖

題竹寄劉郁武

不見劉伶三十載白沙翠竹有餘清幾時顰鼻峰頭去共酌流霞看晚晴



東里續集卷六十